

Nacrt Statuta

Na osnovu čl. 10. i 12. 61. Zakona o udruženjima i fondacijama Bosne i Hercegovine ("Službeni glasnik BiH", broj: 32/01) na sjednici Osnivačke Skupštine, održane u Sarajevu dana 06.11.2021. godine, usvojen je

STATUT

Udruženja otorinolaringologa i hirurga/kirurga glave i vrata u BiH

I - OSNOVNE ODREDBE

Član 1.

Udruženje otorinolaringologa i hirurga/kirurga glave i vrata u BiH (u daljnjem tekstu: Udruženje) je udruženje, koje je naziv dobilo Odlukom o promjeni naziva udruženja usvojenom u skladu sa Zakonom o udruženjima i fondacijama Bosne i Hercegovine (u daljnjem tekstu: Zakon), na Skupštini Udruženja otorinolaringologa i cervikofacijalnih hirurga FBiH održanoj dana 06.11.2021. godine u Sarajevu. Udruženje je nevladina, nepolitička i neprofitna organizacija, osnovana radi ostvarivanja zajedničkih interesa članova udruženja, koji prihvataju osnovne ciljeve udruženja, bez namjere sticanja profita.

Član 2.

Udruženje je stručno i naučno / znanstveno Udruženje koje okuplja ljekare/lekare u BiH koji se bave dijagnostikom i liječenjem bolesti uha, nosa i grla; osnovano radi praćenja razvoja i dostignuća medicinskih i srodnih nauka, javnog istupanja, organizovanja stručnih sastanaka i rasprava, seminara, simpozijuma, kongresa kao i uspostavljanje saradnje i kontakata sa programima otorinolaringoloških udruženja u drugim zemljama.

Član 3.

Društvo stiče svojstvo pravnog lica upisom u registar koje vodi Ministarstvo pravde Federacije BiH.

Član 4.

Ovim Statutom, u skladu sa Zakonom uređuju se slijedeća pitanja:

- 1) naziv i sjedište udruženja;
- 2) ciljeve i djelatnost udruženja;

- 3) zastupanje i predstavljanje udruženja;
- 4) organe udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da saziva skupštinu;
- 5) oblik i sadržaj pečata udruženja;
- 6) oblik i sadržaj znaka ako udruženje odluči da ima znak;
- 7) sticanje i raspolaganje imovinom;
- 8) način donošenja finansijskog izvještaja i izvještaja o radu;
- 9) postupak za donošenje statuta, izmjena i dopuna statuta i drugih općih akata udruženja;
- 10) uvjete i način učlanjenja, prestanak članstva, kao i prava, dužnosti i odgovornost članova udruženja;
- 11) uvjete i postupak za pripajanje, razdvajanje, transformaciju ili prestanak rada udruženja;
- 12) pravila za raspodjelu preostale imovine u slučaju prestanka rada udruženja.

Statutom se mogu urediti i druga pitanja od značaja za ciljeve i djelatnost udruženja.

II - NAZIV I SJEDIŠTE I ODLUČIVANJE U UDRUŽENJU

Član 5.

Puni naziv Udruženja je: **Udruženja otorinolaringologa i hirurga/kirurga glave i vrata u BiH**

Skraćeni naziv Udruženja je: **Orligiku**

Član 6.

Sjedište Udruženja korelira sa sjedištem u kojem je izabran Predsjednik Udruženja i mijenja se svake četiri (4) godine. Trenutno sjedište je u Sarajevu, ulica Bolnička 25, **Klinički centar Univerziteta u Sarajevu, Klinika za gastroenterohepatologiju. ????????**

Član 7.

Udruženje ima svoj znak:

????????????????????????????????????

Član 8.

Skupština radi u sjednicama i kvorum je 2/3 (dvije trećine) svih članova Skupštine. Skupština donosi odluke natpolovičnom većinom glasova prisutnih članova.

III - CILJEVI RADA

Član 9.

Udruženje je osnovano radi ostvarivanja zajedničkih interesa njenih članica, bez namjere sticanja profita.

Osnovni ciljevi rada su:

- promoviranje legalnih interesa članova Udruženja,
- edukacija i informisanje,
- praćenje razvoja i dostignuća medicinskih i srodnih nauka i upoznavanja članova s tim dostignućima u cilju unapređivanja njihovih znanja i osposobljavanja,
- zajednički rad sa svim nivoima vlasti kada je u pitanju otorinolaringološka djelatnost,
- zajednički rad i razmjena iskustava sa medicinskim institucijama u Bosni i Hercegovini,
- pomoć u organizovanju edukacije medicinskim radnicima iz cijele Bosne i Hercegovine iz oblasti Otorinolaringologije, glave i vrata,
- uspostavljanje saradnje i kontakata sa otorinolaringološkim programima udruženja iz Evrope i Svijeta,
- ostvarivanje drugih zajedničkih interesa članova Udruženja.

Član 10.

Utvrđene ciljeve Udruženje ostvaruje na način određen Zakonom, ovim Statutom i drugim opštim aktima.

U ostvarivanju svojih ciljeva Udruženje se neće uključivati u predizborne kampanje niti će prikupljati sredstva za kandidate ili za finansiranje političkih stranaka.

IV- ČLANOVI UDRUŽENJA

Član 11.

Članovi Osnivača stiču svojstvo članova Udruženja danom njene registracije, odnosno promjenom upisa u Registru udruženja.

Svojstvo člana Udruženja stiče se pod uvjetima utvrđenim ovim statutom.

Udruženje sačinjavaju ljekari kojima je osnovni cilj dijagnostika i liječenje bolesti organa uha, grla, nosa, glave i vrata.

Članovi Udruženja mogu postati i strani državljani koji se bave navedenom problematikom ili su na neki način za nju vezani, ako podnesu zahtjev za prijem u članstvo i potpišu izjavu o prihvatanju ciljeva i Statuta Udruženja i kad budu primljeni u članstvo na Skupštini Udruženja.

Član 12.

Počasni član Udruženja može postati ljekar i drugi građanin Bosne i Hercegovine i cijelog svijeta bez obzira na mjesto rada i boravka, koji je osobito zaslužan ili za rad Udruženja ili za praćenje razvoja i dostignuća medicinskih ili srodnih nauka.

Odluku o dodjeljivanju počasnog članstva donosi Skupština udruženja.

Predsjednik Skupštine Udruženja izdaje počasnom članu Uvjerenje o počasnom članstvu u pravilu na Skupštini ili svečanom zasjedanju Udruženja.

Član 13.

Članstvo u Udruženju je dobrovoljno.

Zahtjev za učlanjenje u Udruženju podnosi se Udruženju na adresu sjedišta.

Član 14.

Osim načina iz tačke 11. stav 1., ljekari stiču svojstvo člana Udruženja na osnovu zahtjeva za prijem u članstvo i Izjave o prihvatanju ciljeva i Statuta Udruženja.

Član 15.

Kvalifikovani potencijalni članovi ORL društva (specijalizanti I specijalisti) postaju punopravni članovi Udruženja popunjavanjem pristupnice I redovnim plaćanjem članarine.

Član 16.

Članstvo u Udruženja prestaje:

- istupanjem člana iz Udruženja,
- isključenjem člana iz Udruženja zbog neplaćanja članarine,
- težom povredom odredbi Statuta i drugih općih akata,
- u slučaju smrti,
- prestankom Udruženja.

Član 17.

Svaki član Udruženja može istupiti iz Udruženja do 31. decembra tekuće kalendarske godine, na osnovu pismene izjave o istupanju koju dostavlja Skupštini Udruženja najkasnije tri mjeseca prije istupanja.

Kao dan prestanka članstva smatrat će se 31. decembar tekuće godine.

Član 18.

Član Udruženja koji grubo krši Statut, ne izvršava svoje obaveze prema Udruženja, svojim postupcima nanosi štetu Udruženju, ili članovima Udruženja, ili narušava ugled struke, može biti isključen iz Udruženja.

Prije donošenja odluke o isključenju, član Udruženja mora biti obavješten o prijedlogu za isključenje, kao i o razlozima zbog kojih se predlaže isključenje. Članu Udruženja mora se ostaviti razuman rok za izjašnjenje o pokrenutom prijedlogu za isključenje iz Udruženja.

Prijedlog za isključenje člana može podnijeti svaki član Udruženja. Odluku o isključenju člana donosi Skupština Udruženja.

Protiv odluke Skupštine, u roku od 30 dana, može se izjaviti prigovor Skupštini Udruženja, koja će preispitati svoju odluku i čija odluka donesena po prigovoru je konačna.

Član 19.

Član koji istupi ili koji je isključen iz Udruženja, dužan je izvršiti obaveze prema Asocijaciji dospjele do dana prestanka članstva.

Član 20.

Skupština Udruženja može donijeti opšti akt, kojim će u skladu sa ovim Statutom, bliže urediti način i postupak stupanja u članstvo i prestanak članstva.

Član 21.

Članovi Udruženja imaju slijedeća prava i obaveze:

- da biraju i da budu birani u organe Udruženja,
- da aktivno učestvuju u ostvarivanju ciljeva Udruženja,
- da budu redovno i blagovremeno obavještavani o aktivnostima Udruženja,
- da sarađuju sa ostalim članovima Udruženja,
- da čuvaju i podižu ugled Udruženja,
- da uredno plaćaju članarinu i izvršavaju druge preuzete obaveze
- da ostvaruju druga prava i dužnosti utvrđene Statutom i opštim aktima Udruženja.

V - ORGANI UDRUŽENJA

Član 22.

Organi Udruženja su:

- Skupština i
- Predsjednik

SKUPŠTINA UDRUŽENJA

Član 23.

Skupština Udruženja je najviši organ Udruženja koju čine svi članovi Udruženja.

Član 25.

Skupština Udruženja nadležna je za:

- donošenje Statuta, izmjene i dopune Statuta i drugih akata određenih Statutom,
- odlučivanje o pripajanju, razdvajanju, transformaciji, raspuštanju i prestanku rada kao i o drugim statusnim promjenama u Udruženju,
- izbor i razrješenje Predsjednika Udruženja i drugih organa Udruženja,
- donošenje godišnjeg Program rada Udruženja i Pravilnika o dodjeljivanju priznanja i nagrada Udruženja,
- utvrđivanje smjernica za program saradnje sa međunarodnim organizacijama i udruženjima u BiH iz oblasti otorinolaringologije, glave i vrata,
- razmatranje i odlučivanje o izvještajima koje podnosi Predsjednik Udruženja i drugi organi Udruženja,
- biranje počasnih članove Udruženja na prijedlog članova Udruženja,
- odlučivanje o visini i načinu plaćanja članarine,
- odlučivanje o raspolaganju imovinom Udruženja,
- odlučivanje o ostalim pitanjima koja nisu stavljena u nadležnost drugih organa Udruženja.

Član 26.

Skupština Udruženja se sastaje po potrebi, a najmanje jednom godišnje.

Skupštinu saziva Predsjednik najmanje 15 dana prije njenog zasjedanja.

Član 27.

Predsjednik Udruženja je dužan sazvati Skupštinu u slučaju kada to zahtijeva najmanje jedna trećina članova Skupštine.

Član 28.

Sjednice Skupštine Udruženja održavaju se kao redovno zasjedanje ili vanredno zasjedanje.

Član 29.

Redovno zasjedanje se održava jednom godišnje.

Vanredno zasjedanje se može zakazati samo u slijedećim slučajevima:

- na zahtjev Predsjednika Udruženja,
- na zahtjev članova Udruženja sa najmanje jednom trećinom glasova koji predlažu sazivanje zbog: isključenja člana Udruženja, izmjena Statuta Udruženja i prestanka rada Udruženja

Član30.

Svaki član Udruženja, kod odlučivanja na sjednici Skupštine, ima 1 (jedan) glas.

Svaki član Udruženja može prisustvovati Skupštini lično ili putem zastupnika, drugog člana Skupštini na osnovu pismene punomoći za zastupanje.

Jedan član Udruženja na Skupštini, pored sebe, može zastupati najviše još jednog člana Udruženja, a na osnovu pismenog ovlaštenja.

Član 31.

Skupština Udruženja ima kворum za rad ako Skupštini prisustvuje, lično ili putem zastupnika, najmanje dvije trećine od ukupnog broja članova.

Skupština Udruženja odlučuje većinom glasova prisutnih članova, uvažavajući stav iz člana 8. ovog Statuta, osim o pitanjima koja se odnose na prijem novih članova i prestanak svojstva člana Udruženja, o kojima se odluke donose natpolovičnom većinom od ukupnog broja članova.

Član 33.

Bliže odredbe o načinu rada Skupštine, glasanja, odlučivanja, upućivanja poziva za sjednice, vođenju zapisnika i drugim pitanjima od značaja za rad Skupštine uređuju se Poslovníkom o radu Skupštine.

PREDSJEDNIK UDRUŽENJA

Član 34.

Predsjednik Udruženja vrši funkciju izvršnog organa Udruženja, koji obavlja poslove između dva zasjedanja Skupštine, a na načelima utvrđenim ovim Statutom i smjernicama dobivenim na Skupštine Udruženja.

Član 35.

Predsjednik Udruženja predstavlja i zastupa Udruženja u zemlji i inostranstvu, provodi odluke, programe i preporuke svjetske asocijacije ljekarskih udruženja za otorinolaringologiju, Svjetske zdravstvene organizacije kao i Skupštine Udruženja a naročito:

priprema sjednice Skupštine Udruženja

- prati realizaciju finansijskog plana rada Udruženja, i donosi prijedloge odluka o upotrebi sredstava,
- vrši kontrolu zakonitosti finansijskog poslovanja Udruženja, predlaže budžet i stara se o izvršenju budžeta Udruženja, priprema nacrt Statuta i drugih akata koje donosi Skupština, provodi politiku, zaključke i druge odluke koje je donijela Skupština, podnosi godišnji i periodične izvještaje o svom radu Skupštini,
- ostvaruje kontakte sa preduzećima (firmama), ustanovama, institucijama i drugim pravnim i fizičkim licima u cilju obezbjeđivanja sponzorstva za aktivnost Udruženja,
- obavlja druge poslove, predviđene Statutom i aktima Udruženja.

Član 36.

U vršenju svoje nadležnosti Predsjednik Udruženja je ovlašten da vrši kontrolu svih dokumenata koji se odnose na finansijsko poslovanje, ugovora kojima Udruženje preuzima finansijske obaveze, kontrolu stanja na računima Udruženja, kontrolu periodičnih i godišnjih obračuna Udruženja.

O zakonitosti finansijskog poslovanja Udruženja i o svime radu Predsjednik Udruženja izvještava Skupštinu Udruženja najmanje jednom godišnje.

Član 37.

Predsjednika Udruženja bira i razrješava Skupština većinom glasova od ukupnog broja članova Udruženja, na period od četiri (4) godine.

Predsjednika Udruženja, u slučaju njegove odsutnosti ili spriječenosti za rad, zamjenjuje član koga on predloži.

Član 38.

Predsjednik Udruženja obavlja slijedeće poslove:

- predstavlja i zastupa Udruženja,
- saziva sjednice Skupštine Udruženja i predsjedava sjednicama,
- obavještava javnost o radu Udruženja,
- stara se o zakonitosti rada Udruženja
- učestvuje u pripremi, predlaganju i realizaciji programa rada Udruženja,
- priprema i predlaže mjere i aktivnosti za razvoj i unapređenje rada Udruženja potpisuje akte i odluke i druge pisane dokumente iz nadležnosti Skupštine Udruženja,
- uspostavlja i razvija saradnju sa drugim organizacijama, udruženjima i ustanovama,
- vrši i druge poslove za koje je ovlašten Statutom ili koje mu povjeri Skupština Udruženja.
-

VI- IMOVINA UDRUŽENJA I KORIŠTENJE I RASPOLAGANJE SREDSTVIMA UDRUŽENJA

Član 43.

Imovinu Udruženja čine: prava, stvari i novac, koje Udruženje stiče u skladu sa Zakonom i ovim Statutom.

Član 44.

Udruženje može sticati prihode iz sljedećih izvora:

- članarine;
- dobrovoljnih priloga i poklona fizičkih i pravnih lica, kako u gotovini tako i u imovini i uslugama;
- ugovora sa javnim institucijama, fizičkim i pravnim licima;
- prihoda od kamata, dividendi, dobiti od kapitala, zakupnina, honorara i sličnih izvora;
- prihoda stečenih kroz ostvarivanje ciljeva i aktivnosti Udruženja, u skladu sa ovim Statutom.
- drugih izvora u skladu sa važećim zakonima.

Član 45.

O sticanju prihoda, korištenju imovine i raspolaganju sredstvima Udruženja odlučuje predsjednik Udruženja u skladu sa ovim Statutom i opštim aktima Udruženja koje donasi Skupština.

Član 46.

Udruženja je dužno uredno voditi poslovne knjige u skladu sa prihvaćenim računovodstvenim principima i sastavljati finansijske izvjestaje, saglasno važećim propisima.

Član 47.

Predsjednik Udruženja je dužan, najmanje jednom godišnje, podnijeti Skupštini Udruženja izvještaj sa podacima o imovini Udruženja, korištenju imovine, prihodima i rashodima Udruženja i drugim pitanjima od značaja za raspolaganje imovinom i za finansijsko poslovanje Udruženja.

Član 48.

Udruženja raspolaže svojom imovinom u skladu sa ovim Statutom i Zakonom. Nadzor nad finansijskim poslovanjem Udruženja vrši Skupština Udruženja.

Član 49.

Lice ovlašteno da potpisuje akte koji se odnose na sticanje i raspolaganje imovinom Udruženja i na finansijsko poslovanje je: Predsjednik Udruženja ili drugo lice koje ovlasti Skupština.

Ostvarivanje prava iz prethodnog stava dužna je osigurati Skupština, najkasnije u roku 15 dana od dana prijema pismenog zahtjeva člana Udruženja

VII- JAVNOST RADA

Član 51.

Rad Udruženja je javan.

Javnost rada Udruženja ostvaruje se na način utvrđen zakonom i ovim Statutom.

Član 52.

Organi Udruženja su dužni da ovlaštenim predstavnicima sredstava informisanja učine dostupnim podatke, informacije i isprave koje se odnose na rad Udruženja.

Predstavnici sredstava informisanja imaju pravo da prisustvuju sjednicama organa Udruženja i da izvještavaju o radu tih organa.

Član 53.

Članovi Udruženja imaju pravo da budu redovno informisani o radu Udruženja. O informisanju članova Udruženja stara se predsjednik Udruženja.

Član 54.

Izuzetno, opštim aktom koji donosi Skupština može se utvrditi da pojedine informacije, podaci i isprave, predstavljaju poslovnu tajnu. Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

VIII- STATUT I DRUGI OPŠTI AKTI UDRUŽENJA

Izmjene i dopune statuta

Član 55.

Inicijativu za izmjene i dopune Statuta može podnijeti svaki član Udruženja. Inicijativa se podnosi Skupštini pismenim putem i sa odgovarajućim obrazloženjem.

Član 56.

Prijedlog za izmjene i dopune Statuta utvrđuje predsjednik Udruženja. Utvrđeni prijedlog dostavlja se Skupštini Udruženja, pismenim putem i sa odgovarajućim obrazloženjem najmanje 30 dana prije dana održavanja sjednice Skupštine.

Član 57.

O izmjenama i dopunama Statuta odlučuje Skupština, većinom glasova ukupnog broja članova Udruženja.

Član 58.

Predsjednik Udruženja potpisuje 4 primjerka Odluke o izmjenama i dopunama Statuta, koji se smatraju originalima i čuvaju se u arhivi Udruženja.

IX- ZASTUPANJE UDRUŽENJA

Član 60.

Udruženje zastupa Predsjednik Udruženja.

Član 61.

Udruženje može donijeti odluku kojom će ovlastiti i druga lica da zastupaju Udruženje.

Odlukom iz prethodnog stava Udruženje će utvrditi i ovlaštenja, odnosno ograničenja ovlaštenog lica u zastupanju Udruženja.

Član 62.

U postupcima u kojima Udruženje učestvuje kao strana radi ostvarivanja svojih prava, dužnosti i odgovornosti pred nadležnim organima, izrade Statuta, dopuna i izmjena Statuta, predsjednik Udruženja može dati pismenu punomoć za zastupanje advokatu ili drugom stručnom licu.

STATUSNE PROMJENE

X- PRIPAJANJE, RAZDVAJANJE I TRANSFORMACIJA UDRUŽENJA

Član 63.

Udruženju se može pripojiti drugo udruženje i Udruženje se može pripojiti drugom udruženju. Udruženje se može transformirati u Udruženje od javnog interesa.

Član 64.

Odluku o pripajanju ili transformaciji donosi Skupština Udruženja na prijedlog predsjednika Udruženja.

Odlukom iz prethodnog stava se reguliše naročito:

- naziv Udruženja kome se Udruženje pripaja ili naziv Udruženja nakon transformacije u Udruženje od javnog interesa, kao i sjedište i adresu;
- podjela imovine, prava i obaveza i drugo od značaja za:

Član 65.

Odluka iz prethodnog člana Statuta smatra se usvojenom kada je na sjednici Skupštine prihvatila više od polovine od ukupnog broja članova Asocijacije.

XI- PRESTANAK RADA UDRUŽENJA

Član 66.

Udruženje može prestati sa radom dobrovoljno ili po sili Zakona.

Član 67.

Udruženje prestaje sa radom dobrovoljno, ako Skupština dvotrećinskom većinom svih članova Udruženja donese odluku o raspuštanju Udruženja.

Član 68.

Istovremeno sa odlukom o raspuštanju Udruženja, Skupština donosi plan likvidacije Udruženja, kojim se utvrđuje raspored imovine, prava i obaveze Udruženja, u skladu sa Statutom Udruženja.

Skupština imenuje likvidatora Udruženja čija dužnost je da se stara o izvršenju plana likvidacije i koji je ovlašten da zastupa Udruženje u postupku likvidacije i u podnosanju zahtjeva za prijavu prestanka rada Udruženja nadležnim organima.

Član 69.

U postupku likvidacije Udruženja iz imovine Udruženja izmiriće se sve dospjele zakonske obaveze, kao i obaveze nastale prema drugim povjeriocima Udruženja, a eventualna preostala imovina rasporediće se na članove Udruženja srazmjerno njihovom doprinosu u plaćanju članarine.

XII – POSTUPAK ZA IZMJENE I DOPUNE STATUTA

Član 70.

Izmjene i dopune ovog Statuta donose se po istom postupku po kojem se donosi i Statut. Statut, kao i izmjene i dopune Statuta i druge opće akte Udruženja priprema Predsjednik Udruženja, a inicijativu za izmjene i dopune osim predsjednika, mogu dati najmanje još 3 (tri) člana Skupštine Udruženja. Tumačenje odredbi ovog Statuta daje Skupština Udruženja. Izmjene i dopune Statuta i druge opće akte donosi Skupština Udruženja.

XII- PRELAZNE I ZAVRŠNE ODREDBE

Član 71.

Ovaj Statut stupa na snagu danom usvajanja na Skupštini Udruženja, a primjenjivaće se od dana promjene imena Udruženja u Registar kod nadležnog ministarstva. Danom stupanja ovog Statuta na snagu prestaje-u važiti raniji Statut-i.

Član 72.

Predsjedavajući Osnivačke Skupštine potpisuje 4 primjerka ovog Statuta.

Svi primjerci iz prethodnog stava smatraju se originalima.

Br. 01-01/21

Sarajevo, 06.11.2021. godine

PREDSJEDAVALJUĆI OSNIVAČKE SKUPŠTINE

Primarius dr. Rusmir Arslanagić